

Dumonda Gort concernent il project da pilot per professionalisar clubs gronds en il Grischun – contribuziun a quint da la finanziaziun speziala Sport

En la sessiun da december 2024 sun jau ma drizzà en l'ura da dumondas cun la dumonda menziunada qua survart a la Regenza. Perquai che la resposta era, a mes avis, per part faussa e perquai ch'ella chaschuna per part novas dumondas, ma driz jau cun questa intervenziun a la Regenza.

En sia comunicaziun dals 26-09-2024 ha la Regenza infurmà davart il project da pilot per professionalisar clubs gronds. La ha la Regenza scrit: «A las uniuns Chur Unihockey e Piranha Chur ha la Regenza garantì ina contribuziun chantunala da maximalmain 135 000 francs per onn or da la finanziaziun speziala Sport per il project da pilot da 3 onns che prevesa da professionalisar clubs gronds en il Grischun.»

A mia emprima dumonda ha la Regenza respondì: «Perquai ch'il project da pilot è da natira organisatorica e structurala, n'èsi betg da partir dal fatg, ch'el portia in avantatg da concorrenza sportiv direct.»

En il conclus da la Regenza statti: «Cun il project da pilot duain vegnir rimnadas experientschas preziusas, schebain las investiziuns en ina direcziun pli effizienta sa laschan refinanziar cun retgavs pli gronds e schebain ina meglra direcziun da l'uniun sa paja per las commembras ed ils commembers sco er per las collavuraturas ed ils collavurats tant ord vista sportiva sco er organisatorica.»

Qua sa cuntradi la Regenza resp. quai vul dir, uschenavant ch'il project da pilot ha success.

A mia dumonda, tenor tge basa legala che la Regenza concediss quests daners, en cas che quest project avess in decurs positiv, ha il president da la Regenza Parolini respondì: «Quests meds finansials vegnan ord la finanziaziun speziala Sport. Quai vul dir: meds da la lottaria naziunala – quel sector che stat a disposiziun per il sport. Ed en quest senn è quai la basa da quests meds finansials.» Qua tematisescha la Regenza mo il vasch, betg dentant las basas giuridicas.

Las sutsegnadras ed ils sutsegnaders drizzan perquai las suandantas dumondas a la Regenza:

1. Sco quai ch'i resulta dal conclus da la Regenza, exista senz'auter er in dischavantatg da concorrenza sportiv per ils auters clubs. Co quinta la Regenza da cumpensar quest dischavantatg, ma er il dischavantatg finanziel per ils auters clubs?
2. La resposta en l'ura da dumondas areguard ils criteris per ils clubs para plitost arbitrara. Er la declaraziun dal president da la Regenza Parolini, che disciplinas da sport individual e clubs professionals, sco il HCD, sajan exclus, ma para arbitrara. Tenor tge basas legalas decida la Regenza e conceda ella daners or dal vasch «finanziaziun speziala Sport»?
3. En cas dad otg clubs fissan quai custs periodics annuals da ca. 1,1 milliuns francs a quint da la finanziaziun speziala Sport. Co vegnan finanziadas questas expensas supplementaras? Dispona quest vasch d'avunda meds finansials, per che nagin na stoppia trair la curta?
4. Quant ditg durass ina cofinanziaziun dals custs da persunal tenor l'opiniun da la Regenza?

Cuira, ils 12 da favrer 2025

Gort, Kocher, Bavier, Adank, Altmann, Berthod, Berweger, Bettinaglio, Brenn, Candrian, Casutt, Cortesi, Della Cà, Dürler, Gansner, Hartmann, Heim, Jochum, Menghini-Inauen, Mittner, Morf, Rauch, Righetti, Schneider, Schutz, Sgier, Städler, Weber, Zanetti (Landquart)